

YANGI O'ZBEKISTON

Ijtimoiy-siyosiy gazeta

№ 181 (970), 2023-yil 6-sentabr, chorshanba



www.yuz.uz



yuz.uznews



yuz_official



yuz.uz_news



O'ZBEKISTON PREZIDENTI POKISTON DELEGATSIYASINI QABUL QILDI

O'zbekiston Respublikasi Prezidenti Shavkat Mirziyoyev 5-sentabr kuni Pokiston Islom Respublikasi Qurolli kuchlari Quruqlik qo'shinlari qo'mondoni general Asim Munir boshchiligidagi delegatsiyani qabul qildi.



O'zbekiston bilan Pokiston o'rtasidagi ko'p qirrali hamkorlikni yanada rivojlantirish va strategik sheriklik munosabatlarini mustahkamlash masalalari muhokama qilindi.

Uchrashuv avvalida yuqori darajali mehmon davlatimiz rahbariga Pokiston Prezidenti Orif Alviy va Bosh vazir vazifasini bajaruvchi Anvar Kakarning salomi va eng ezgu tilaklarini yetkazdi.

Suhbatda ilgari qabul qilingan "yo'l xaritasi"ga muvofiq o'zaro savdoning yuqori o'sish sur'atini davom ettirish, infratuzilmaviy loyihalarni tezlashtirish hamda ikki mamlakat yetakchi korxonalarining kooperatsiya aloqalarini kuchaytirish masalalariga alohida e'tibor qaratildi.

Mintaqaviy xavfsizlikni ta'minlash yuzasidan, shu jumladan, Afg'onistondagi

vaziyatning rivojlanishi nuqtayi nazaridan fikr almashildi.

"Termiz — Mozori-Sharif — Peshovar" temir yo'lini barpo etish loyihasini ilgari surish maqsadida amaliy sa'y-harakatlarni muvofiqlashtirish muhimligi ta'kidlandi.

O'ZA

O'zbekiston Respublikasi Prezidenti Matbuot xizmati surati.

SHAVKAT MIRZIYOYEV: MUSTAQIL TARIXIMIZDA BIRINCHI MARTA BUNDAY SHAHAR QURAYAPMIZ

Prezident Shavkat Mirziyoyev 5-sentabr kuni Yangi Toshkent shahrining Bosh rejasini loyihasi bilan tanishdi.

Bugungi kunda Toshkent shahrida yashayotgan va ishlayotgan aholi soni qariyb 5 million nafarni tashkil qilmoqda. Ko'plab uy-joylar, muassasalar barpo etilib, infratuzilma tarmoqlariga yuklama ortmoqda. Shunga qaramay, yana yiliga 20 ming xonadonli uylar, 40 dan ortiq maktab, bog'cha, poliklinika qurishga talab bor. Urbanizatsiya sur'atidan kelib chiqilsa, yaqin yillarda aholi soni yanada ko'payadi.

Davlatimiz rahbari bu masalani alohida e'tiborga olib, Toshkentni rivojlantirish rejalarni 15-20 yil oldindan belgilash vazifasini qo'ygan edi. Shundan kelib chiqib, shahardan tashqarida, zamonaviy arxitektura yutuqlari asosida yangi markaz qurishga kirishildi.

Joriy yil 20-iyulda Yangi Toshkent shahrini barpo etish chora-tadbirlari bo'yicha Prezident qarori qabul qilindi. Unga muvofiq, Bosh vazir rahbarligida Yangi Toshkentni barpo etish ishlarini muvofiqlashtiruvchi kengash tuzildi hamda direksiya tashkil etildi. Qurilish va uy-joy kommunal xo'jaligi vazirligida bu loyihaga mas'ul o'rinbosar lavozimi joriy qilindi.

Ushbu ulkan loyiha uchun Toshkent viloyatining Yuqori Chirchiq va O'rta Chirchiq tumanlaridan 19 ming 720 gektar yer tanlab olingan. Birinchi bosqichda 2,5 ming gektarda 100 ming aholi uchun uy-joylar va infratuzilma obyektlari qurish rejalashtirilgan. Direksiya tomonidan yetakchi xorijiy kompaniyalar jalb etilib,

rivojlangan mamlakatlarda muvaffaqiyatli sinovdan o'tgan amaliyotlar asosida Bosh reja, tarmoq rejalari va manzilli dasturlar ishlab chiqilmoqda.

"ToshkentboshplanLITI" davlat unitar korxonasi Bosh reja loyihasi taqdimoti o'tkazildi. Qurilish va uy-joy kommunal xo'jaligi vazirining o'rinbosari — "Yangi Toshkent shahrini barpo etish direksiyasi" direktori hududni infratuzilma bilan ta'minlash, yo'l va ko'priklar qurish masalalari, muhandislik, shaharsozlik va arxitektura yechimlari bo'yicha axborot berdi.

Loyihada yashillik, qulaylik va tejamkorlikka alohida e'tibor qaratilgan, faol iqtisodiyot va ijtimoiy hayot uyg'unlashtirilgan, transport tarmoqlari poytaxtimiz bilan oqilona bog'langan.

Umuman aytganda, Yangi Toshkent "aqlli" va "bog' shahar" bo'lishi nazarda tutilmoqda. Ma'muriy markazda davlat idoralari, Yangi O'zbekiston universiteti, kutubxona, tarix muzeyi, madaniyat saroylari joylashadi. Shuningdek, shaharda ishbiarmonlik va innovatsiya tumanlari, ta'lim, tibbiyot va turizm klasterlari bo'ladi. 420 gektar maydonda markaziy bog', mavzalar orasida sun'iy kanal va ko'llar, Chirchiq va Qorasuv daryolari bo'yida sayilgohlar tashkil qilinib, odamlarning dam olishi uchun so'lim sharoitlar yaratiladi. "Toshkentning yashil belbog'i" loyihasi shu joydan boshlanadi.

Bu komponentlar loyihasi Singapur, Angliya, Xitoy, Germaniya, Turkiya, Niderlandiya, Janubiy Koreya, BAA kabi

davlatlarning 20 ta ilg'or kompaniyasi tomonidan ishlab chiqilmoqda. Davlatimiz rahbari infratuzilma tarmoqlarini ilg'or standartlar bilan uyg'unlashtirish zarurligini ta'kidladi.

O'ttiz ikki yillik mustaqil tariximizda birinchi marta bunday shahar qurayapmiz, bunga dunyodagi ilg'or kompaniyalarni jalb qilyapmiz. Lekin bizdagi sohalar, standartlar shunga mosmi? — deya savol qo'ydi Shavkat Mirziyoyev. — Ular zamonaviy loyihalar bilan hamohang bo'lishi kerak. Shuning uchun qurilish, energetika, kommunal, ekologiya, irrigatsiya, transport kabi hamma tegishli sohalaridagi qonunlarni, standartlarni jahonning eng yuqori talablariga muvofiq takomillashtirish zarur.

Prezident Bosh reja asosida yil oxiriga qadar batafsil loyihalash ishlarini yakunlash, birinchi bosqich inshootlari bo'yicha loyihachi va quruvchi korxonalarni aniqlash bo'yicha ko'rsatmalar berdi.

Nima uchun bu loyihani shoshmasdan, qayta-qayta ko'ryapmiz? Bu shahar yuz yillab xalqqa xizmat qilishi kerak. Odamlar birinchi o'rinda bo'lishi, kelajakdagi qurilishlar ham inobatga olinishi zarur. Birinchi bosqich mukammal qurilsa, maktab bo'ladi, — dedi davlat rahbari.

Bo'lajak binolar va infratuzilma ekspluatatsiyasini hozirdan o'ylash, bu bo'yicha mutaxassislar tayyorlash zarurligi ta'kidlandi.

O'ZA

INSON QADRI UCHUN

Mahalla "Vatan ichidagi mo'jaz vatan" deyilishi bejiz emas. Hayotimizning ko'p qismi, tabiiyki, quvonchli lahzalarimiz ham, sinovli damlarimiz ham mahallada kechadi. Shu bois, u yerdagi o'zgarishlar har birimizning hayotimizga, taqdirimizga to'g'ridan-to'g'ri ta'sir qiladi.

Ijtimoiy-iqtisodiy islohotlarda mahalla infratuzilmasi rivojiga qaratilayotgan alohida e'tibor xalqimizning dunyoqarashi va turmush tarzida tub o'zgarish yasamoqda. Ayniqsa, mahallabay ishlash tizimi yo'lga qo'yilishi natijasida hayotimizda uchraydigan ko'plab masalalar yechimini chinakam xalq ovozi bo'lgan mahalla



UY HAM, KO'CHA HAM O'ZIMIZNIKI

darajasiga tushirish, mahalladan turib davlat organlariga murojaat qilish tizimini yaratish borasida izchil ishlar olib borilmoqda.

Prezidentimiz mustaqilligimizning 32 yilligi munosabati bilan bir guruh yurtdoshlarimizga davlat mukofotlarini topshirish marosimida mahalla tizimi-

dagi islohotlar xususida yana bir karra to'xtalib, uni rivojlantirish bo'yicha ishlarimiz qat'iy davom ettirilishini alohida ta'kidladi.

Darhaqiqat, keyingi yillarda tizimdagi islohotlar tobora jadallashib bormoqda. Mahallada ro'y berayotgan o'zgarishlar

esa xalqimizning hayotiga o'zgacha ma'no-mazmun baxsh etmoqda, yurtdoshlarimiz, ayniqsa, yoshlarimiz shuunda yurt taqdiriga daxldorlik tuyg'usini yuk-saltirmoqda.

Davomi 3-betda

MUNOSABAT

TASHABBUSLAR AMALIY HARAKATGA AYLANMOQDA

Joriy yil 18-avgustda tadbirkorlar bilan ochiq muloqot mamlakatimizda biznes muhiti yanada yaxshilanishi uchun navbatdagi qadam bo'ldi. Muloqot doirasida tadbirkorlardan 6 mingta taklif va tashabbus kelib tushdi. Bu kichkina raqam emas. Shu bilan birga, ko'rib chiqilishi zarur bo'lgan tizimli masalalarga yechim sifatida qilingan murojaatlar ular. Bular, albatta, e'tibordan chetda qolmasligi aniq edi.

Ochiq muloqotdan ko'p o'tmay, "O'zbekiston Respublikasi Prezidentining tadbirkorlar bilan 2023-yildagi ochiq muloqotida belgilangan vazifalarni amalga oshirish chora-tadbirlari to'g'risida"gi qaror qabul qilindi. Mana shu qarorning o'ziyiq bizda tadbirkorlik nechog'liq katta ahamiyatga ega ekanidan dalolatdir.

Davomi 4-betda



MILLAT FIDOYLARI



Ijod ahlidan o'zbek jadid xotini-qizlari hayotidan so'zlaguvchi bir she'r riv roman yozilayotgani haqida eshitib, ushbu asar bilan bog'liq izlanish jarayoniga qiziqib qoldik.

"Men bu asarni o'tgan asrning eng qora kunlariga qaytib, jadid momolarimiz bilan birga yonib, kuyib, mustabid tuzum qamoqxonalarning zax yerto'alarida faryod chekib yozdim. Ular nima uchun bunchalar qattiq azob va g'am chekdi? Millatni ozod ko'rish, ma'rifatlil va baxtli kunlar tezroq kelishi uchun o'z umrini qurbon qilgan jasoratli ayollar edi", deydi she'r riv roman muallifi, O'zbekiston Respublikasida xizmat ko'rsatgan madaniyat xodimi Sharifa SALIMOVA.

Davomi 6-betda

SPORT — RUH VA DIL TANTANASI



IKKI KARRA OLIMPIADA CHEMPIONI BO'LAMAN!

5-betga qarang.

